

Callahan - Grossel - O'Sullivan

I.

De Bone Amor vient Seance et Biautez,
Et Amors vint de ces deus autressi.
Tuit troi sont un, que bien i ai pensé;
Je ne seront a nul jor departi.
Par un conseil ont ensenble establi
Lor correors, qui sontavant alé.
De mon cuer ont fet lor chemin ferré.
Tant l'ont usé, ja n'en seront parti.

II.

Li correor sunt la nuit en clarté,
Et le jor sont por la gent obscurci:
Li douz regart et li mot savoré,
La grant biauté et li bien que j'i vi.
N'est merveille se je m'en esbahi:
De li a Deus le siecle enluminé,
Car qui verroit le plus biau jor d'esté,
Lés li seroit obscurs a plain midi.

III.

En Amor a paor et hardement;
Cil dui sunt troi et dou tiers sunt li dui,
Et granz valors est a aus apendanz,
Ou tuit li bien ont retrait et refui.
Por ce est Amors li hospitaus d'autrui,
Que nus n'i faut selonc son avenant,
Més j'ai failli, dame qui valez tant,
A vostre ostel, si ne sai ou je sui.

IV.

Or n'i a plus fors qu'a lui me conmant,
Que toz penserz ai laissez por cestui:
Ma bele joie ou ma mort i atent,
Ne sai lequel desques devant li fui.
Ne me firent lors li oeil point d'anui,
Ainz me vindrent ferir si doucement
Dedens le cuer d'un amoureux talent,
Qu'encor i est le cous que j'en reçui

V.

Li cop fu granz il ne fet qu'enpirier,

Ne nus mirez ne m'en porroit saner,
Se cele non qui le dart fist lancer.
Se de sa main i daignoit adesper,
Bien en porroit le cop mortel oster
A tot le fust, dont j'ai tel desirrier,
Mais la pointe du fer n'en puet sachier,
Qu'ele brisa dedenz au cop douner.

E.
Dame, vers vos n'ai autre messagier,
Par cui vos os mon corage envoyer,
Fors ma chançon, se la volez chanter.

- letto 516 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/callahan-grossel-osullivan>